

Sramotna manipulacija bivšim policijskim službenicima



Prvi zamjenik visokog predstavnika Raffi Gregorian danas se susreo sa predstavnicima decertificiranih policajaca.

Gregorian je rekao da su očigledne manipulacije ovom grupom "sramotne". On je nakon sastanka rekao da je jasno da su ovim bivšim policijskim službenicima političari, koji žele da "prebace krivicu za svoj neuspjeh na OHR", namjerno dali nepotpune informacije.

Institucije BiH su svjesne da pismo Vijeća sigurnosti UN-a iz aprila 2007. godine ne daje povlašteni tretman decertificiranim policajcima za povratak u tijela za provedbu zakona.

Dvadesetdevetog juna 2007. godine, Vijeće ministara je donijelo odluku da pismo predsjednika Vijeća sigurnosti UN-a proslijedi nadležnim ministarstvima na nivou entiteta, kantona i Distrikta Brčko kako bi poduzeli mjere.

Devet kantona i Distrikt Brčko već su donijeli amandmane koji ispunjavaju zahtjeve iz spomenutog pisma. Parlamentarna skupština BiH i Parlament Federacije učiniće isto u sljedećih nekoliko dana. Republika Srpska i Kanton 10 moraće ispuniti iste zahtjeve.

U najvećem dijelu BiH radi se na tome da zakonski uvjeti navedeni u pismu predsjednika Vijeća sigurnosti UN-a iz aprila 2007. godine, prema kojima decertificirani policajci mogu da se prijavljuju za upražnjena mjesta u policijskim organima, budu provedeni.

OHR je učinio više od bilo koga drugog da navede UN da uzme u

razmatranje tešku situaciju u kojoj se nalaze decertificirani policajci. "OHR je proveo tri godine u razgovorima sa UN-om zagovarajući da se provede revizija odluka o certifikaciji koje je IPTF donio 2002. godine", Gregorian je danas rekao bivšim policajcima. UN je odbio tu mogućnost, ali je odlučio da ukine doživotnu zabranu zaposlenja u policiji. "To nije idealno rješenje, ali je jedino rješenje koje UN nudi", rekao je Gregorian.

Činjenica da su najodgovornije institucije napravile potrebne izmjene pokazuje da nema dileme kada je riječ o poruci pisma Vijeća sigurnosti UN-a.